

UPM terbit Buku 'Wagyu: Bukan Sekadar Lembu', hurai informasi warisan dan sejarah wagyu



KUALA LUMPUR, 28 Mei - Pusat Penerbit Universiti Putra Malaysia (UPM) telah menerbitkan Buku 'Wagyu: Bukan Sekadar Lembu' merupakan perkongsian pengalaman penulis, Datuk Husam Musa yang menghuraikan informasi warisan dan sejarah budaya pemeliharaan wagyu. Buku itu telah dilancarkan oleh Menteri Pertanian dan Keterjaminan Makanan, Datuk Seri Mohamad Sabu di Pesta Buku Antarabangsa Kuala Lumpur 2024 baru-baru ini.

Pengarah Pusat Penerbit UPM, Prof. Ir. Ts. Dr. Mohamed Thariq Hameed Sultan berkata buku tersebut mengetengahkan peranan wagyu dalam menggalakkan inovasi dan kelestarian dalam industri pertanian.

"Buku ini akan menjadi sumber bacaan umum yang berharga bukan sahaja kepada para profesional pertanian malah masyarakat umum yang ingin mengetahui lebih mengenai wagyu dan peranannya dalam kelestarian makanan global," katanya.

Selain itu, buku tersebut turut memberi pandangan beliau berkenaan pentingnya negara dalam memajukan industri ternakan lembu tempatan dengan baka, budaya dan kaedah penternakan wagyu. Dalam pada itu, Buku 'Wagyu: Bukan Sekadar Lembu' ini juga mengungkap keunikan wagyu serta perjalanan wagyu dari peternakan hingga ke meja makan yang memaparkan proses penting dalam memastikan kualiti makanan yang tinggi.